

## Beim Lehrer Welsch en de Klass

*E klein Thiaterstöckelche vom Levve un levve losse op Kölsch*

*Dietmar Kinder*

*( Alternativfassung **B** – die betrieff ävve nur hee de „2 Optrett“*

*( also nur die → Segge 4b, 5b un 6b jäjen die → Segge 4, 5 un 6 us-tuhsche )*

*Ansönste es alles wie beim → „1., 3. un 4. Optrett“, also wie bei → **A***

### 2. Optrett

*Die Pänz setzen ald do, de Lehrer Welsch kütt eren, die Pänz ston all op.*

- Lehrer** *Morje Kenge !*
- Kinder** *Morje, Här Lehrer !*
- Lehrer** *Sezst üsch ! Wat för ne Daag ha' mer dann hüek ?*
- Hannes** *Mon....daag, Här Lehrer...*
- Lehrer** *Wie küss'te dann dodrop, Hannes ?*
- Hannes** *Weil mir hüek Vollmond han.*
- Lehrer** *Nä Hannes, dat es nit de Jrund. Un hüek es och nit Mondaag.  
Wat meens du dann, Nettsche ?*
- Nettsche** *Sonndaag, Här Lehrer...?*
- Lehrer** *Un wie küss du dodrop ?*
- Nettsche** *Weil de Sunn hüek esu schön schingk.*
- Lehrer** *Nä, deit mer leid, ävver die Antwoot es och nit richtig.  
Un wat jlöuvs du, Tünnemann ?*
- Tünn** *Freitag, Här Lehre !*
- Lehrer** *Un wieso Freitag ?*
- Tünn** *Meine Papa hat heut vom Werk extra frei jekricht, weil...*
- Lehrer** *...deine Papa hat heut vom Werk extra frei jekricht....?*
- Tünn** *.... ja, weil heut mein Tant Billa mit Ohm Jupp nach Amerika wandere wolle.*

- Lehrer** *Du meins auswandere.....  
Dein Tant Billa un deine Onkel Jupp wolle auswan.....?*
- Tünn** *.... ja, nach Amerika...!*
- Lehrer** *Nach Amerika, janz allein....?*
- Tünn** *.... nee, mit ihrem halben Dorf aus der Eifel..., Papa is einer von denen, die die auf so ner Karre bis an et Schiff nach Rotterdam bringe.*
- [ klein Paus, der Lehrer Welsch fährt sich mit de Hand über's Jesicht ]*
- Lehrer** *Nä Tünn, heut is Donnersdaag, de ganze Daag.*
- Pitterche** *Secher, weil et heut noch eh kräftig Donnerwetter jibt...?*
- Lehrer** *Nä, Pittersche, hüek jitt et kei Donnerwedder, hüek ha'mer e Wedder för Engelche. Luurt doch, wie schön de Sunn schingk, genau su wie 't Nettsche jesaht hät....*
- [ macht wieder en klein Paus ]*
- Lehrer** *Am beste ihr merkt üsch för die Wochendaage dat foljende Sprüchelche:*
- De Woch, die fängk me'm Mondaag aan,  
dann kütt de Dengsdaag flöck eraan,  
am Mettwoch weed de Woch jedeelt,  
am Donnersdaag weed nit krakeelt  
weil et am Friedaag nur Quallmänn jitt,  
zo däm mer manchmol Herring kritt.  
Am Samsdaag wird sich dann jebadt,  
für de Kirch am Sunndaag staats jemaat.*
- Su, hat ihr dat verstande ?!*
- Kinder** *Jaaah.....!*
- Lehrer** *Un wesst ihr dat och en fuffzig Johr noch ?!*
- Kinder** *Jaaah.....!*
- Lehrer** *Bestimmp ?*
- Kinder** *Jaaah.....!*

